

EH. Ekitaldi politikoa egingo dute maiatzaren 5ean Donostian, Anoetako belodromoan



EDURNE KOCH
Arnaldo Otegi eta Juanjoxe Petrikorena, belodromoko ekitaldiaren eta web orriaren aurkezpenean.

Otegi: «Aukera burujabetza edo autonomia zatikatzalea dela gero eta argiago dago»

EAJk Estatutuaren eta Konstituzioaren aldeko apustua egingo duela adierazi du

Xabier Makazaga | DONOSTIA

Maiatzaren 13ko hauteskundeetan «aukera independentista bakarra» Euskal Herriarrok izango dela esan zuen Arnaldo Otegi, atzo. EHko bozeramaileak «poza» agertu zuen, eztabaida politikoa «benetako parametroetan» sartu bide delako, eta «argazkia gero eta argiago» ikusten dela erantsi. «Alde batean, PP-PSOE-UA bloke espainolista dago, euskaldunek zati-

tuta jarraitzea nahi duena, eta Estatutua eta Konstituzioa marko politiko ukiezintzat dituen; eskertzekoa da haien proposamena hain garbi adieraztea. Beste aldean, EH dago, eta espainolistek bezain argi aurkezten dugu gure proposamena; marko berria behar dela, burujabetza behar dela, eta Euskal Herria estatu izan behar dela European», esan zuen Otegi.

Eztabaida politikoa hori delarik, «arazoa» EAJ-EA koalizioa-

DATUA

Maiatzaren 5ean, ekitaldi politikoa belodromoan

Zuzenean internet bidez. Donostiako belodromoan ekitaldi politikoa egingo du EHk maiatzaren 5ean, eta «berriro, belodromoa txiki» utziko dutela iragarri zuen Otegi. Ekitaldia internet bidez zuzenean jarraitu ahal izango da. Izan ere, hauteskundeetarako paratu duten web orria aurkeztu zuen atzo EHk. euskal-herriarrok.org/hautes01 da helbidea.

ren jarrera dela azpimarratu zuen EHko bozeramaileak: «Ez dute ezer esan, eta gure etengabeko eskaera da bi proiektu politiko horien artean zer aukera egiten duten argitzea».

Zer bide hartuko duen esan gabe ere, EAJren aukera garbi geratu dela erantsi zuen Otegi: «EAJ gero eta garbiago ari da erretratatzeko, eta Alderdi Sozialistaren konpainia bilatzen ari da. Bi proiektuen artean, Estatutuaren eta Konstituzioaren aldeko aukera egin duela garbi dago». Hori «pozteko datu politikoa» dela esan zuen Otegi, «gauzak gero eta argiago daudelako».

Hiru geltokiko tren Madrilera, edo sei geltokiko Bruselara

Eztabaida «zentratua» dagoela nabarmendu zuen Otegi: «Edo autonomia zatikatzalea, edo burujabetza eta estatu izatea; ez dago tarteko biderik. Hori da guk espreski nahi genuena, eta horregatik gaude pozik».

Adibide grafiko batekin azaldu zituen EHko bozeramaileak bi proiektu politikoak: «Batzuek diote hemen tren bakarra hiru geltokiko tren izan behar dela, eta Madrilera eramaten duela. Guk esaten dugu gure trenak sei geltoki badituela, eta ez doala ez Madrilera eta ez Parisera, Bruselan duela azken geltokia. EAJk ez du esaten nora doan bere tren. Baina esaten ez dutenez, guk ondorioa ateratzen dugu: sozialistak nahi badituzte makinan, tren hori hiru geltokikoa da, eta Madrilera begira jarriko du berriro EAJk».

EAEko hauteskundeetan aukera soberanista eta independentista bakarra ezker abertzalea dela esan zuen Otegi: «Gu gara sektore guzti horien erreferentzia politiko bakarra». Eta abertzale eta aurrerakoi guztiei egin zien, maiatzaren 5ean Donostiako belodromoan.

KOMUNIKABIDEAK

TVEk sozialistek ematen dien tratua Gobernuak aldaraziko duela uste du Zapaterok

Agentziak | MADRIL

Zenbait buruzagi sozialistak RTVEk PSOEri ematen dion tratamendua gaitzetsi dutelarik, Madrilgo Gobernuak jarrera hori aldaraziko duen itxaropena agertu zuen atzo PSOEko idazkari nagusi Jose Luis Rodriguez Zapaterok.

EAEko hauteskunderi begira, PPko Gobernuak «entzun, hausnartu eta zuzendu» egingo duela uste du Zapaterok. Espainiako komunikabide publikoetan «aniztasunaren degradazio larria» gertatzen ari dela erantsi zuen.

RTVEren neutraltasun eskaera berretsi egin zioten atzo PSOE, EAJk eta IUk. Gaspar Llamazaresek hautes-helegiteak ere iragarri zituen, «zentsura eta difamazioa amaitzeko».

PPk, baina, RTVEri egitiko kritika horiek «oinarri gabeak» direla erantzun die. PSE-EEko idazkari Nicolas Redondo «bazter guztietan» agertzen dela esan zuen Rafael Hernandok. Carlos Iturgaitzek esan zuen PSE-EEko inork ez diola kexurik agertu, «eta etengabe biltzen naiz buruzagi sozialistekin». Kritikak «urduritasunari» egotzi dizkio Iturgaitzek.

BOTO-EMATEA

Egun batez luzatu dute botoa postaz emateko eskaera egiteko epea

Agentziak | MADRIL

Posta bidez botoa emateko eskaera egiteko epea egun batez luzatu du Hauteskunde Batzorde Zentralk. Hala, maiatzaren 4a arte egin ahal izango da botoa postaz emateko inprimakien eskaera, posta bulegoetan.

PSE-EEk egin zion eskaera EAEko Hauteskunde Batzordeari, eta posta bulegoak maiatzaren 3ko gauerdia arte irekita egon zitezen proposatu. Hauteskunde Batzorde Zentralk postako bulegoak berezko ordutegian jardutea erabaki du, baina epea hurrengo eguna arte luzatu du.

EB-IU. Nafarroaren eta EAEren arteko lankidetzaren alde agertu dira Madrazo eta Taberna

PPekin hitzartuz gero, haiek indartu baino ez duela egingo ohartarazi dio Madrazok PSE-EEri

Erredakzioa | IRUÑEA

PSE-EE ohartarazi zuen atzo EB-IUko koordinatzaile Javier Madrazok, PPekin hitzartzen badu politikoki indartuta popullarrak aterako direla. EAEko eta Nafarroako autonomi erkidegoen arteko harremanak izan zituzten hizpide, atzo, Madrazok eta NEB-IUNko koordinatzaile Felix Tabernak.

PSN Nafarroan UPNrekin lankidetzan ari dela nabarmendu zuen Madrazok, eta politiko-

ki «irabazten» atera dena UPN izan dela. «Adibide hori aintzat hartu beharko luke PSE-EEK, eta PPekin duen aliantza hautsi. Ezkerretik aurrerapenerako alternatiba sendo bat osatzeko gai izan beharko genuke, Euskal Herriako eta Espainiarako. Bestela, PSEk PPekin bat egin da jarraitzen badu, eskuinarentzat izango da onura».

EB-IUk bakea lortzeko bide gisa alderdien arteko elkarriketa defenditzen duela hein berean, EAEko eta Nafarroako

«erkidego anaien artean» lankidetzaren, elkar ulertze eta hurbiltze harremanak bultzatzea beharrezko ikusten duela adierazi zuen Madrazok.

Bien arteko «harreman normalizatu» eragotzen duten arrazoiak bi direla esan zuen: euskal nazionalismoaren eta PP eta UPNren jarrerak «Euskal nazionalismoak ez du onartzen Nafarroak erabaki gaitasuna izan behar duela, eta nafarrek hurbiltzea errefusatzeko eragiten du horrek; PPk eta UPNk,

berriro, Nafarroaren eta EAEren arteko urruntzea eta enfrentamendua bultzatzen dute; bi erkidegoak elkarri bizkarra emanda bizitzea nahi du PPk, baina gorrotoa ereiten duenak gero gorrotoa biltzen du».

Hego Euskal Herriko biztanleen nahia bi erkidegoen arteko harremanak «berreskuratzea» dela esan zuen Madrazok, eta hori «eginkizun politikoa» izan behar dela.

Felix Tabernak ere Nafarroa eta EAEren arteko loturak «estutzeko premia» nabarmendu zuen, «harremana gaiztoa baita». Beti ere, Nafarroaren erabaki gaitasuna errespetatuz.